

## EXERCICIOS DE AUTOAVALIACIÓN

1. En que se diferenza a fonética da fonoloxía?
2. Pode un fonema ter máis dun son?
3. Cales son as clases de fonemas segundo o modo de articulación?
4. A que fonemas corresponden as grafías subliñadas nas seguintes palabras: *medo*, *nova*, *ben*, *todo*, *cero*, *cousa*, *xato*, *taxi*.
5. Sinala os hiatos, os ditongos e os tritongos na seguinte secuencia. Clasifica os ditongos en crecentes e decrecentes: *Teño unha tía no Paraguai que cambia de residencia cada tres por catro. Vive nun ambiente que non lle é moi propicio, por iso se resente frecuentemente da saúde.*
6. Sinala os dígrafos da seguinte secuencia: *Unha rapaza tiña un carro co que carretaba as colleitas e os guerreiros de chumbo.* Fai a representación fonolóxica do fonema que representan.
7. Cando se escribe (c), cando (qu) e cando (z)? Cando se escribe (b) e cando (v)? Cando se escribe (r) e cando (rr)?

### Solucións:

1. En que a fonética se ocupa do estudo dos sons, realidades materiais ou concretas, mentres que a fonoloxía se ocupa do estudo dos fonemas, realidades inmateriais ou abstractas. A fonética sitúase no plano da fala, en tanto que a fonoloxía se sitúa no plano da lingua.
2. Si. Un fonema pode ter máis dun son, pois ao ser o son a realización dun fonema, son moitas as circunstancias que poden afectar a esa realización. Así, por exemplo o fonema /b/ pode realizarse como oclusivo bilabial sonoro, ou pode realizarse fricativizado. Cando definimos un fonema temos que facelo optando por un dos sons, por iso puidera parecer que a cada fonema corresponde un son, pero non é así.
3. Tendo en conta os modos de articulación os fonemas poden ser: vogais (pechados, medios, abertos) e consonánticos (oclusivos, fricativos, africados, oronasais, laterais e vibrantes).
4. O (e) de *medo* representa un fonema vocálico medio-pechado, anterior; o (o) de *nova* representa un fonema vocálico, medio-aberto, posterior; o (e) de *ben* representa un fonema vocálico, medio-aberto, anterior; o (o) de *todo* representa un fonema vocálico medio-pechado, posterior; o (c) de *cero* representa un fonema consonántico, fricativo, interdental, xordo; o (c) de *cousa* representa un fonema consonántico, oclusivo, linguovelar, xordo; o (x) de *xato* representa un fonema consonántico, fricativo, linguopalatal, xordo, e o (x) de *taxi* representa un par de sons [ks]; un sería consonántico, oclusivo, linguovelar, xordo [k] e o outro sería consonántico, fricativo, linguoalveolar, xordo [s].

5. *Tía* (ía), hiato; *Paraguay*, (uai) tritongo; *cambia*, (ia) ditongo crecente; *residencia*, (ia) ditongo crecente; *ambiente*, (ie) ditongo crecente; *moi*, (oi) ditongo decrecente; *propicio*, (io) ditongo crecente; *frecuentemente*, (ue) ditongo crecente; *saúde*, (aú) hiato.

6.

Dígrafo	Representación fonolóxica do fonema
(nh) de <i>unha</i>	/ɲ/
(rr) de <i>carro</i> , <i>carretaba</i> , <i>guerreiros</i>	/r̄/
(qu) de <i>que</i>	/k/
(ll) de <i>colleitas</i>	/ʎ/
(gu) de <i>guerreiros</i>	/g/
(ch) de <i>chumbo</i>	/t͡ʃ/

7. Escríbese (c) cando queremos representar o fonema consonántico, fricativo, linguointerdental, xordo, ou o fonema consonántico, oclusivo, linguovelar, xordo; escríbese (qu) cando queremos representar o fonema consonántico, oclusivo, linguovelar, xordo diante de (e, i); escribimos (z) cando queremos representar o fonema consonántico, fricativo, linguointerdental, xordo diante de (a, o, u) e excepcionalmente diante de (e, i). Escribimos (b) para representar o fonema consonántico, oclusivo, bilabial, sonoro naquelas palabras que en latín tiñan a grafía (b) ou (-p-) intervocálico e escríbese (v) nas palabras que tiñan en latín (v) ou (u). Escribimos (r) para representar o fonema consonántico, vibrante, simple, linguoalveolar, sonoro, en posición intervocálica; tamén se escribe (r) para representar o fonema consonántico, vibrante, múltiple, linguoalveolar, sonoro, en posición inicial ou tras consoante; escríbese (rr) cando en posición intervocálica queremos representar o fonema vibrante, múltiple, linguoalveolar, sonoro.